



BIVŠI DIREKTOR FEDERALNE UPRAVE ZA INSPEKCIJSKE POSLOVE + A A A -

## DEMANT: Ibrahim Tirak – nećemo dopustiti da Alzira Hota iznosi laži protiv nas!?

Autor: Dnevno.ba Srijeda, 20. Srpanj 2016. u 16:12

Sviđa mi se Podijeli 1

**SARAJEVO** - Bivši direktor Federalne uprave za inspeksijske poslove Ibrahim Tirak odlučio je reagirati povodom objave određenih tekstova na portalu "Dnevno.ba" koji mu nisu baš najbolje "sjeli", pa stoga ovom prilikom u potpunosti objavljujemo demant dotičnoga:

"Na vašem portalu, već nekoliko puta, objavljivali ste članke o navodnim kriminalnim radnjama, krivičnim prijavama i postupcima koji se vode pred nadležnim Tužiteljstvom Kantona Sarajevo, i/li Općinskom sudu Sarajevo protiv Ibrahima Tirka, bivšeg direktora Federalne uprave za inspeksijske poslove i s njim u vezi i značajnom broju službenika ove Uprave, koje se imenom i prezimenom označavaju kao osobe koje su se udružile radi činjenja nezakonitih radnji. Pored objave članaka koji nisu pisani jezikom profesionalnog žurnaliste objavljivali ste i slike kojima vrijeđate ličnost čovjeka, iz perioda njegovog liječenja, a senzacionalističkim naslovima ste privlačili pažnju čitatelja.

Autor sadržaja članka koji je objavljen dana 27.06.2016. godine (koji članak su preuzeli i drugi portali) je isti onaj koji je sačinio članke već ranije objavljivane na vašem portalu, na koje je Federalna uprava za inspeksijske poslove reagirala i prema vlasniku portala i Vijeću za tisak, tražeći objavu demantija po Zakonu o zaštiti od klevete, i zabranu svakog daljnjeg blaćenja i iznošenja neistina krajnje uvredljivog i malicioznog sadržaja.

Ova i slična pisanja imaju za cilj rušenje moralnih i ljudskih vrijednosti kako bivšeg direktora Tirka, tako i uposlenika Federalne uprave imenovanih u članku, čija se imena nezasluženo provlače kroz vaša pisanja, a posebno nanose nesagledive štetne posljedice ugledu ovog federalnog organa čiji je zadatak kontrola zakonitosti u primjeni propisa.

Unatoč činjenici da je samo negativna vijest dobra vijest, i da skandal i senzacija privlače čitateljsku publiku, nastojimo vjerovati kako se vi ipak zalažete za kvalitet i korektno i profesionalno pisanje uz poštivanje visokih moralnih načela kodeksa novinarstva, te da niste do kraja upoznati sa stvarnim posljedicama koje članci koje objavljujete mogu proizvesti.

I ovaj članak na koji vam ukazujemo, iznova obiluje mnoštvom uvredljivih, nekorektnih, netočnih i neproverenih tvrdnji baš kao i svi drugi kojima je ista autorica mjesecima držala pažnju vaše čitateljske publike oko kriminala u Federalnom ministarstvu rada i socijalne politike.

Naime, osoba koja dobija medijski prostor je gospođa Alzira Hota, koja je godinama bila uposlena u Federalnoj upravi za inspekcijske poslove, ali nije radila. Ista osoba koja vam prenosi netočne informacije o navodnim kriminalnim radnjama, godinama nije radila, a uredno je primala plaću zloupotrebjavajući institut bolovanja. Pomenuta gospođa je s bolovanja pisala desetine tužbi i prijava ne samo protiv mog klijenta i Federalne uprave za inspekcijske poslove nego i protiv Sindikata, Federalnog ministarstva rada i socijalne politike, Zajedničkih institucija FBiH, Porezne uprave itd.

Smatramo da se radi o osobi koja je kverulant i koja stalno podnosi tužbe i prijave, osobi protiv koje je više puta pokretan prekršajni postupak za narušavanje javnog reda i mira, te nam uopće nije jasno kako takva osoba može uopće doći do tolikog medijskog prostora.

Da se ne radi samo o izdvojenom mišljenju moga klijenta, u prilogu ovoga pisma vam dostavljamo presude Općinskog suda u Sarajevu, a iz koje se vidi da je ista gospođa odbijena sa tužbenim zahtjevima navodne povrede njenih prava, te da je Zavod zdravstvenog osiguranja platio naknadu štete Federalnoj upravi za inspekcijske poslove zbog toga što je gospođa Alzira Hota zloupotrebjavala bolovanje. Pored svih problema koje ima Zavod zdravstvenog osiguranja, isti još mora plaćati štetu što pomenuta neće da radi.

Naravno, pretpostavljamo da gospođa nije donijela niti jedan dokaz da postoji bilo kakva presuda suda u njenu korist ili bilo kakva odluka Vlade FBiH ili Tužiteljstva po njenim prijavama. Uz dostavljene odluke suda možemo dostaviti i druge presude Općinskog suda u Sarajevu, dokaze o vođenjima prekršajnih postupaka itd.

Pozivamo vas da stopirate daljnje prenošenje neistina i naročito iznošenje imena uposlenika Federalne uprave za inspekcijske poslove, a sud i druge organe pustite da rade svoj posao. Ukoliko se pravomoćnim presudama dokažu krivična djela i postojanje zločinačkog udruženja kako se to u članku spominje, imat ćete prostora i mogućnosti da na vašem portalu objektivno pišete o tome.

Do tada vas pozivamo da objavite ovaj tekst shodno članku 8. zakona o zaštiti od klevete FBiH bez odlaganja na vašem portalu i na istom mjestu, bez sarkastičnih naslova kao u prošlom demantu".